



UKA16/33

11. oktober 2016

Mimi Karlsen

### **Meeqqat atuarianni ilinnusiat (atuartitsissutit) qaffasissusaanik Naalakkersuisut misissueqqullugit peqquneqarnissaanik Inatsisartut aalajangiiffigisassaattut siunnersuut. Misissuinermit inerniliussaqa UKA2017-imi saqqummiunneqassaaq.**

(Inatsisartunut ilaasortaq Suka K. Frederiksen, Siumut)

#### **Ilinnusiorfik**

Inuit Ataqatigiit meeqqat atuarianni ilinnusiat (atuartitsissutit) qaffasissusaanik Naalakkersuisut misissueqqullugit Suka K Frederiksenip siunnersuutaa soqutigintartipparput.

Meeqqat siunissatsinnut isumalluutigigatsigit sutigut tamatigut atugaasa illersorseqarnissaat, atugaasa pitsaasuunissaat, ilikkagassaasalu qaffasissunissaat isumannaarniartuaannartariaqarparput. Meeqqat ilikkartilluarutsigit siunissami iluaqutiginerusinnaavarput.

Soorlu Naalakkersuisut akissumminni ersersikkaat qujanartumik nunatsinni meeqqat atuarianni ilinniutit amerlassutsimikkut ajunngaat. Atuartitsissutini assigiingitsuni meeqqat atuagassaat sanaartorneqartuarpur. Qujanartumik aamma nunat avannarliit meeqqat atuagaannut ataatsimoorlutik sanatitseqatigiisinnaasarpur, taannalu pitsaassutsimik aamma qulakkeerinninnerusarpoq. Nunatsinni meeqqat atuarianni atuagateqarumalluta Ilinnusiorfik pilersinneqarnikuuvoq.

Ilinnusiorfik, atuarianni atuartitsissutaasartunut tamanut atuartitsinissamut najoqqutassiat naapertorlugit, atortussanik saqqummersitsisarpoq.

Ilinnusiorfup ilinnusiornermut ataatsimiitsitaliaqarput, atuakkat ilinniutit pitsaassutaannik qulakkeerinninniartartunik. Taakkulu aalajangertarpaat atuakkiassaqa ilumut naqineqarnissaminut naapertuunnersoq. Tamanna assut toqqissisimanarpoq, - tassami kinaluunniit allaannariarluni isummani naapertorlugu ilinnusiorsinnaangimmat.

Tamanna iluatsillugu Naalakkersuisunut apeqqutiginiarpurput Pilersuiffiup, Ilinnusiorfiup Naalakkersuisut ataaniilernerani ilinniutsiornermi ataatsimiitsitaliaq ataannassanersoq?

Inuit Ataqatigiit isumaqarput ilinnusiornermut ataatsimiitsitaliaqarneq ilinnusiat pitsaasuunissaannik nakkutilleeqataasuusoq pingaartuq atatiinnartariaqartorlu. Misissuinissamut piffissaq aningaasallu atugassat meeqqat pitsaasunik ilinusianik atuagaqartinneqarnissaata nakkutigineqarnera pingaarnerutippurput. Aammattaaq atuakkat kisiisa pinnagit internetsikkuttaaq ilinniutit pitsanngorsarnissaat qulakkeerusunneruarpur.

Ilinnusiarpassuit nalilersorneqaaqqinnissaat pingaartinngikkaluarlugu pitsaasunik ilinnusiornissap qulakkeerneqarnissaa pingaartipparput taamaammat ataatsimiititaliami ilinnusiorneq oqaluuuserilluaqqunaqaaq.